



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2011. GODINU SOCIJALDEMOKRATSKE PARTIJE BOSNE I HERCEGOVINE

Broj: 03-07-6-394/12  
Sarajevo, 30. juli 2013. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole .....	5
Cilj pregleda i kontrole .....	5
Obim pregleda i kontrole .....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	6
5.1 NALAZI .....	6
5.2 PREPORUKE .....	10

## MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Socijaldemokratske partije Bosne i Hercegovine za 2011. godinu.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka ("Službeni glasnik BiH" br. 22/00, 102/09 i 54/10)<sup>1</sup> – u daljem tekstu: Zakon o finansiranju i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

- 1. Socijaldemokratska partija Bosne i Hercegovine prekršila je odredbe člana 3. stav (1), člana 8. stav (1) i člana 11. stav (1) i stav (3) Zakona o finansiranju i odredbe člana 15.10 Izbornog zakona BiH.**

**Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na finansiranje ove političke stranke suprotno odredbama Zakona o finansiranju.**

---

<sup>1</sup> Dana 5.12.2012. godine stupio je na snagu novi Zakon o finansiranju političkih stranaka ("Službeni glasnik BiH" br. 95/12).

## 1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja Socijaldemokratske partije Bosne i Hercegovine za 2011. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Socijaldemokratska partija Bosne i Hercegovine je ostvarila ukupne prihode u iznosu od 4.502.729,24 KM, čija struktura je data u sljedećoj tabeli<sup>2</sup>:

Red. br.	Vrsta prihoda	Iznos u KM	Učešće u uk. prih. %
1	Članarina	473.433,41	10,51%
2	Prilozi fizičkih lica	25.712,41	0,57%
3	Prilozi pravnih lica	30.050,00	0,67%
4	Prihodi od imovine	657.355,41	14,60%
5	Prihodi od pr. lica	0,00	0,00%
6	Prihodi od poklona	0,00	0,00%
7	Prihodi iz budžeta	3.300.890,09	73,31%
	Ostali prihodi	15.287,92	0,34%
	<b>Ukupni prihodi:</b>	<b>4.502.729,24</b>	<b>100,00%</b>

U godišnjem finansijskom izvještaju stranka je iskazala ukupne rashode u iznosu od 3.619.189,26 KM<sup>3</sup>.

## 2. PREDSTAVLJANJE POLITIČKE STRANKE

Naziv političke stranke: Socijaldemokratska partija Bosne i Hercegovine. Skraćeni naziv stranke je SDPBiH.

Stranka je upisana u registar Višeg suda u Sarajevu 21.03.1990. godine, broj upisa R-I-1/90. Dana 16.03.1999. godine, Socijaldemokratska partija Bosne i Hercegovine je upisana u registar Kantonalnog suda u Sarajevu, pod brojem R-I-1/99.

Sjedište političke stranke je u Sarajevu, ulica Alipašina 41.

Lica ovlaštena za zastupanje stranke su Zlatko Lagumdžija, predsjednik i Nermin Nikšić, generalni sekretar.

Lice ovlašteno za podnošenje finansijskih izvještaja za 2011. godinu je Lidija Korać.

<sup>2</sup> Podaci iz ispravljenog obrasca 3 (ukupni prihodi političke stranke) godišnjeg finansijskog izvještaja za 2011. godinu, koji je dostavljen dana 26.07.2013. godine.

<sup>3</sup> Podaci iz ispravljenog obrasca 4 (ukupni rashodi političke stranke) godišnjeg finansijskog izvještaja za 2011. godinu, koji je dostavljen dana 26.07.2013. godine.

Prema podacima iz godišnjeg finansijskog izvještaja za 2011. godinu, organizacionu strukturu Socijaldemokratske partije Bosne i Hercegovine čine:

- Glavni odbor SDP BiH Sarajevo,
- 10 kantonalnih odbora,
- 4 regionalna odbora,
- 2 gradska odbora,
- 97 općinskih odbora i
- Forum mladih SDP BiH.

### **3. OPIS PREGLEDA I KONTROLE FINANSIJSKOG IZVJEŠTAJA**

**Predmet pregleda i kontrole** je godišnji finansijski izvještaj Socijaldemokratske partije Bosne i Hercegovine za 2011. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju.

**Obim pregleda i kontrole** finansijskih izvještaja Socijaldemokratske partije Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju, odnosno usklađenosti izvora finansiranja i načina trošenja sredstava, sa posebnim naglaskom na prihode od imovine i prihode iz budžeta.

### **4. PRETHODNE KONTROLE I REVIZIJE**

U prethodnom periodu izvršeni su revizija i pregled finansijskih izvještaja Socijaldemokratske partije Bosne i Hercegovine za period od 2004.-2010. godine, nakon kojih su izdati izvještaji o reviziji, odnosno izvještaji o pregledu sa mišljenjem revizora, nalazima i preporukama revizije.

Nakon izvršene revizije za 2010. godinu, Služba za reviziju je izdala Izvještaj o reviziji godišnjeg finansijskog izvještaja Socijaldemokratske partije Bosne i Hercegovine sa mišljenjem revizora, nalazima revizije i preporukama da stranka treba postupati u skladu sa odredbama člana 3. stav (1), člana 8. stav (1) i člana 11. stav (1) i stav (3) Zakona o finansiranju.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2011. godinu, utvrđeno je da Socijaldemokratska partija Bosne i Hercegovine nije ispoštovala preporuke iz Izvještaja o reviziji godišnjeg finansijskog izvještaja za 2010. godinu, odnosno i dalje postupa suprotno odredbama člana 3. stav (1), člana 8. stav (1) i člana 11. stav (1) i stav (3) Zakona o finansiranju.

## 5. NALAZI I PREPORUKE

### 5.1 NALAZI

#### a) Socijaldemokratska partija Bosne i Hercegovine prekršila je odredbe člana 3. stav (1) Zakona o finansiranju.<sup>4</sup>

(1) Na osnovu dokumentacije koja je tokom obavljanja pregleda finansijskog izvještaja za 2011. godinu dostavljena Službi za reviziju, utvrđeno je da je Socijaldemokratska partija Bosne i Hercegovine ostvarila prihode od izdavanja imovine koja nije u njenom vlasništvu, čime su prekršene odredbe člana 3. stav (1) Zakona o finansiranju.

Revizijom je utvrđeno da je Socijaldemokratska partija Bosne i Hercegovine suprotno odredbi člana 3. stav (1) Zakona o finansiranju ostvarila prihode od izdavanja prostorija u Zenici, Varešu i Bosanskom Grahovu, u ukupnom iznosu od 34.588,95 KM.

- Socijaldemokratska partija Bosne i Hercegovine ostvarila je prihode od izdavanja pod zakup poslovnih prostorija u Zenici, Ulica Masarikova broj 48, a za koje ne raspolaže odgovarajućim dokazima o vlasništvu, u ukupnom iznosu od 29.712,00 KM.<sup>5</sup>

Prihode koje je ostvarila po osnovu izdavanja imovine koja nije u njenom vlasništvu u Zenici, SDP BiH je u finansijskom izvještaju iskazala u obrascu 3-c (prihodi od imovine u vlasništvu političke stranke).

- U obrascu 3-c (prihodi od imovine) godišnjeg finansijskog izvještaja, SDP BiH je iskazala prihode od izdavanja poslovnih prostorija u Varešu u iznosu od 3.076,95 KM.<sup>6</sup>

Uvidom u Ugovor o zakupu poslovnog prostora, broj: 14-17-2-3/09 od 19.01.2009. godine, i Aneks ugovora o zakupu poslovnog prostora, broj: 14-17-2-4/09 od 16.02.2009. godine, koje je Socijaldemokratska partija Bosne i Hercegovine sklopila sa PTP "MPM" Vareš, utvrđeno je da je stranka izdavala poslovne prostorije, površine 174 m<sup>2</sup>, u Varešu, ulica Armije BiH br. 10, i po tom osnovu ostvarila prihode u iznosu od 3.076,95 KM.

- U godišnjem finansijskom izvještaju Socijaldemokratska partija Bosne i Hercegovine je iskazala prihode od izdavanja prostorija u Bosanskom Grahovu u iznosu od 1.800,00 KM.<sup>7</sup> Demokratski narodni savez, Opštinski odbor Bosansko Grahovo je na osnovu Ugovora o zakupu poslovnih prostorija, broj: 01-18/08 od 30.07.2008. godine, koristio poslovne prostorije, površine 38 m<sup>2</sup>, u ulici Maršala Tita br. 13. Stranka je po osnovu izdavanja ovih prostorija, ostvarila prihode u iznosu od 1.800,00 KM.

---

<sup>4</sup> Prema odredbama člana 3. stav (1) Zakona o finansiranju političkih stranaka politička stranka može da se finansira iz sljedećih izvora finansiranja: članarina; priloga pravnih i fizičkih lica; prihoda od imovine u vlasništvu političke stranke; budžeta BiH za finansiranje parlamentarnih grupa u skladu sa članom 10. Zakona, kao i iz entitetskih budžeta i svih njihovih nižih jedinica u skladu sa entitetskim zakonima; dobiti od prihoda preduzeća u vlasništvu političke stranke.

<sup>5</sup> Poslovni prostori u Zenici su izdati sljedećim pravnim i fizičkim licima: "Dubrovnik" d.o.o. Zenica, "Intercons" d.o.o. Zanima i Advokat Dalibor Tikvina.

<sup>6</sup> Na osnovu mišljenja Sektora za prave poslove i provedbu zakona o sukobu interesa, Odsjeka za pravne poslove, broj: SI.05-1-78/12 od 04.06.2012. godine, dokumentacija o vlasništvu nad prostorijama, koju je SDP BiH dostavila Centralnoj izbornoj komisiji Bosne i Hercegovine (kopija Katastarskog plana KO Vareš izdata od Općinske geodetske uprave Vareš dana 19.05.2005. godine, je nepotpuna i ne može se sa sigurnošću utvrditi da li na nepokretnostima SDP BiH ima pravo svojine.

<sup>7</sup> Na osnovu mišljenja Sektora za prave poslove i provedbu zakona o sukobu interesa, Odsjeka za pravne poslove, broj: SI.05-1-78/12 od 04.06.2012. godine, dokumentacija o vlasništvu na prostorijama, koju je SDP BiH dostavila Centralnoj izbornoj komisiji Bosne i Hercegovine (Izvod-prijepis posjedovnog lista Odjela imovinsko-pravnih poslova, Odsjek za katastar i geodetske poslove Općine Bosansko Grahovo od 13.03.2008. godine), je nepotpuna i ne može se sa sigurnošću utvrditi da li na nepokretnostima SDP BiH ima pravo svojine.

- (2) Uvidom u godišnji finansijski izvještaj i izvode iz poslovnih knjiga za 2011. godinu utvrđeno je da je OO SDP BiH Tešanj ostvario prihode po osnovu prodaje ulaznica u iznosu od 2.756,00 KM i prihode od tombole u iznosu od 332,00 KM, što je suprotno odredbama člana 3. stav (1) Zakona o finansiranju.

Naime, Općinski odbor SDP BiH Tešanj je dana 17.12.2010. godine organizovao donatorsku večeru s ciljem prikupljanja sredstava za Fond za stipendiranje. Uvidom u dokumentaciju utvrđeno je da su tokom donatorske večere prikupljena sredstva u ukupnom iznosu od 4.704,50 KM, i to: sredstva od prodatih ulaznica u iznosu od 2.756,00 KM, donacije u iznosu od 1.607,50 KM i sredstva od tombole u iznosu od 332,00 KM.

**b) Socijaldemokratska partija Bosne i Hercegovine prekršila je odredbe člana 8. stav (1) Zakona o finansiranju.<sup>8</sup>**

Pregledom dodatne dokumentacije, utvrđeno je da općinski odbori Socijaldemokratske partije Bosne i Hercegovine koristili bez naknade ili po povoljnijim uslovima prostorije općina, čime su prekršene odredbe člana 8. stav (1) Zakona o finansiranju.

- Općinski odbor SDP BiH Ilidža je u periodu od 01.01. do 31.12.2011. godine koristio po povoljnijim uslovima prostorije Općine Ilidža, površine 32 m<sup>2</sup>.

Dana 07.10.2009. godine, OO SDP BiH Ilidža je sa Općinom Ilidža sklopio Ugovor o zakupu poslovnog prostora, broj: 01-76-10/09. Ugovorom je definisano da će OO SDP BiH Ilidža, počev od 01.10.2009. godine pa do 30.09.2012. godine, koristiti poslovni prostor površine 32,00 m<sup>2</sup>, po cijeni koja je ugovorena u iznosu od 2,00 KM po m<sup>2</sup>, odnosno 10% od početne cijene zakupa po m<sup>2</sup> koja iznosi 20,00 KM za ekstra zonu u kojoj se nalazi navedeni poslovni prostor.

Korištenjem poslovnog prostora po cijeni koja je ispod početne, Socijaldemokratska partija Bosne i Hercegovine je ostvarila prihod u iznosu od 6.912,00 KM<sup>9</sup>.

- OO SDP BiH Novo Sarajevo je tokom 2011. godine koristio bez naknade prostorije Općine Novo Sarajevo, površine 102,20 m<sup>2</sup>. Prema Odluci o dodjeli na korištenje poslovnih prostora i visini i načinu plaćanja zakupnine poslovnih prostora na kojima pravo raspolaganja ima Općina Novo Sarajevo ("Službene novine Kantona Sarajevo", broj 29/07), najniža visina zakupnine po m<sup>2</sup> za prvu poslovnu zonu iznosi 12,00 KM. Neplaćanjem zakupnine za vrijeme korištenja poslovnog prostora Socijaldemokratska partija Bosne i Hercegovine je ostvarila prihod u iznosu od 14.716,80 KM.

- Općinski odbor SDP BiH Ilijaš je na osnovu odluke broj: 05-23-2142/03 od 02.06.2003. godine koristio bez naknade prostorije Općine Ilijaš, površine 33,80 m<sup>2</sup>. Na osnovu Odluke o načinu i visini plaćanja zakupnine poslovnih prostora na području općine Ilijaš ("Službene novine Kantona Sarajevo", broj 2/00), kojom je utvrđena cijena poslovnog prostora na području Ilijaš za neprofitabilne i humanitarne organizacije u iznosu od 8,00 KM/m<sup>2</sup>, utvrđeno je da zakup poslovnog prostora koji koristi SDP BiH iznosi 270,40 KM mjesečno, odnosno 3.244,80 KM

<sup>8</sup> Državni, entitetski i kantonalni organi, organi Brčko Distrikta BiH, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

<sup>9</sup> Mjesečna cijena zakupa poslovnog prostora, površine 32,00 m<sup>2</sup>, za zonu u kojoj se nalazi prostor koji je koristila SDP BiH iznosi 640,00 KM. Međutim, prema odredbama ugovora o zakupu, SDP BiH je Općini Ilidža plaćala mjesečno zakup u iznosu od 64,00 KM i porez na dodatu vrijednost, koji je obračunat na iznos zakupnine od 640,00 KM, u iznosu od 108,80 KM, odnosno ukupno 172,80 KM.

godišnje. Time što nije platila zakupninu za korištenje poslovnog prostora u 2011. godini, SDP BiH je ostvarila prihod u iznosu od 3.244,80 KM.

- Općinski odbor SDP BiH Donji Vakuf je u 2011. godini bez naknade koristio prostorije, površine 32,5 m<sup>2</sup>, u vlasništvu Općine Donji Vakuf. Na osnovu podataka koje je dostavila Općina Donji Vakuf, utvrđeno je da cijena zakupa poslovnog prostora iznosi 10,00 KM/m<sup>2</sup>, odnosno da je zakupnina za poslovni prostor koji je koristio OO SDP BiH Donji Vakuf iznosila 325,00 KM mjesečno. Neplaćanjem zakupnine za vrijeme korištenja poslovnog prostora Socijaldemokratska partija Bosne i Hercegovine je primila nenovčanu donaciju Općine Donji Vakuf u iznosu od 3.900,00 KM.

- Pregledom je, takođe, utvrđeno da su općinski odbori SDP BiH Bosanska Krupa, Jablanica i Sanski Most koristili, bez naknade, prostorije općina Bosanska Krupa, Jablanica i Sanski Most.

**c) Pregledom je utvrđeno da je Socijaldemokratska partija Bosne i Hercegovine prekršila odredbe člana 11. stav (1) i stav (3) Zakona o finansiranju i člana 15.10 Izbornog zakona BiH.**

(1) Na osnovu obavljenog pregleda utvrđeno je da SDP BiH nije uspostavila potpune evidencije o prihodima i rashodima OO SDP BiH Tešanj, odnosno da je prihode i rashode koje je ostvario ovaj odbor po osnovu organizovanja donatorske večere u 2010. godini evidentirala u poslovnim knjigama za 2011. godinu.

(2) Pregledom je utvrđeno da Glavni odbor SDP BiH nije uspostavio adekvatne knjigovodstvene evidencije o prihodima iz budžeta, što je dovelo do pogrešnog iskazivanja prihoda stranke u poslovnim knjigama.

Naime, najveći dio sredstava iz budžeta svih nivoa vlasti koji u skladu sa Zakonom o finansiranju pripadaju Socijaldemokratskoj partiji Bosne i Hercegovine, uplaćuje se na transakcijski račun Glavnog odbora SDP BiH ("Budžetski račun"). GO SDP BiH uplaćena sredstva iz budžeta u poslovnim knjigama evidentira na kontu 3085-Tekuće obaveze za budžet.

Nakon što izvrši raspodjelu sredstava između Glavnog odbora (za platni fond i fond solidarnosti) i nižih organizacionih odbora stranke, stranka vrši povrat novčanih sredstava na transakcijske račune odbora, odnosno vrši knjiženje prihoda u poslovnim knjigama Glavnog odbora i nižih organizacionih odbora stranke.

Pregledom je utvrđeno da je Glavni odbor SDP BiH prihode iz budžeta, koji su nakon raspodjele pripali Glavnom odboru, evidentirao kao Prihode KO/OO za platni fond i Prihode za fond solidarnosti od KO/OO, što nije u skladu sa važećim kontnim planom.

Takođe, utvrđeno je da je na kontu 3085-Tekuće obaveze za budžet na dan 31.12.2011. godine iskazan saldo u iznosu od 34.413,31 KM, što ukazuje da Glavni odbor i niži organizacioni odbori stranke u poslovnim knjigama nisu iskazali prihode u iznosu od 34.413,31 KM.

(3) Pregledom je utvrđeno da SDP BiH u godišnjem finansijskom izvještaju nije u potpunosti iskazala troškove zakupa za poslovne prostore koje su koristili općinski odbori, i to:

- Troškovi zakupa poslovnog prostora koji je koristio Općinski odbor SDP BiH Milići nisu iskazani u obrascima godišnjeg finansijskog izvještaja.



Prema podacima iz ugovora o zakupu koji je sklopljen sa fizičkim licem, mjesečni zakup poslovnog prostora koji je koristio Općinski odbor SDP BiH Milići iznosio je 50,00 KM, odnosno 600,00 KM za 2011. godinu.

- Prema odredbama ugovora o zakupu, godišnji zakup za poslovni prostor koji koristi Općinski odbor SDP BiH Jezero iznosi 1.684,00 KM<sup>10</sup>. Prema podacima GO SDP BiH, stranka je godišnjem finansijskom izvještaju za 2011. godinu iskazala troškove zakupa poslovnog prostora OO SDP BiH Jezero u ukupnom iznosu od 1.440,00 KM, tj. iskazala je manje troškove zakupa za 144,00 KM.

- Prema odredbama ugovora o zakupu, godišnji zakup poslovnog prostora koji koristi Općinski odbor SDP BiH Ljubuški iznosi 1.980,00 KM<sup>11</sup>. Prema podacima GO SDP BiH, Socijaldemokratska partija BiH je u godišnjem finansijskom izvještaju za 2011. godinu iskazala troškove zakupa poslovnog prostora Općinskog odbora SDP BiH Ljubuški u ukupnom iznosu od 1.800,00 KM, što je 180,00 KM manje u odnosu na ugovoreni iznos zakupa.

- (4) SDP BiH nije u obrascu 5 (potraživanja, krediti i dugovanja) pravilno iskazala obaveze prema dobavljaču "Colosseum" Tuzla na dan 31.12.2011. godine, čime su prekršene odredbe člana 23. Pravilnika o godišnjim finansijskim izvještajima političkih stranaka.

Naime, prema podacima iz godišnjeg finansijskog izvještaja za 2011. godinu obaveze SDP BiH prema dobavljaču "Colosseum" Tuzla na dan 31.12.2011. godine iznose 33.786,74 KM. Pregledom je utvrđeno da su obaveze SDP BiH prema ovom dobavljaču na dan 31.12.2011. godine iznosile 23.290,00 KM<sup>12</sup>. Uvidom u analitičku karticu obaveza prema dobavljaču "Colosseum" Tuzla, utvrđeno je da je SDP BiH u svojim poslovnim knjigama na dan 31.12.2011. godine iskazala obaveze u iznosu od 33.786,74 KM, te da je dana 30.06.2012. godine izvršila ispravku knjiženja iz 2011. godine, čime je uskladila svoje obaveze prema dobavljaču.

## **Troškovi predizborne kampanje**

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM<sup>13</sup> po biraču u svakom izbornom krugu, prema broju birača koje je objavila Centralna izborna komisija BiH.

- (1) Prema podacima Centralne izborne komisije BiH, Socijaldemokratska partija Bosne i Hercegovine je učestvovala na Prijevremenim izborima za načelnike općina Srebrenik, Vogošća, Ilidža i Travnik, i u svrhu izborne kampanje je mogla da potroši 47.516,70 KM<sup>14</sup>.

<sup>10</sup> Ugovor o zakupu poslovnog prostora sa fizičkim licem od 01.08.2004. godine, kojim je utvrđena mjesečna zakupnina za poslovni prostor u iznosu od 132,00 KM.

<sup>11</sup> Ugovor o zakupu poslovnog prostora sa fizičkim licem od 01.06.2004. godine, kojim je utvrđena mjesečna zakupnina za poslovni prostor u iznosu od 165,00 KM.

<sup>12</sup> Konfirmacija potraživanja na dan 31.12.2011. godine.

<sup>13</sup> Član 15.10 stav 2. propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

<sup>14</sup> SDP BiH je u svrhu predizborne kampanje na Prijevremenim izborima za Načelnika općine Srebrenik mogla potrošiti 10.690,80 KM, 6.815,40 KM na Prijevremenim izborima za Načelnika općine Vogošća, 16.709,70 KM na Prijevremenim izborima za Načelnika općine Ilidža i 13.300,80 KM na Prijevremenim izborima za Načelnika općine Travnik.

Uvidom u godišnji finansijski izvještaj utvrđeno je da Socijaldemokratska partija Bosne i Hercegovine nije iskazala troškove kampanje za općinske odbore Srebrenik, Vogošća, Ilidža i Travnik.

- (2) Prema podacima Centralne izborne komisije BiH, Socijaldemokratska partija Bosne i Hercegovine je učestvovala na Prijevremenim izborima za Načelnika općine Bihać i u svrhu izborne kampanje je mogla da potroši 15.916,80 KM.

Pregledom je utvrđeno da je SDP BiH postupila suprotno odredbama člana 15.10 Izbornog zakona BiH jer je u svrhu izborne kampanje na Prijevremenim izborima za Načelnika općine Bihać potrošila 18.148,65 KM<sup>15</sup>, što je za 2.231,85 KM više u odnosu na propisani limit na troškove izborne kampanje.

## 5.2 PREPORUKE

*Preporučuje se Socijaldemokratskoj partiji Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da se ne finansira prihodima od imovine koja nije u njenom vlasništvu,*
- *da se ne finansira zabranjenim priložima,*
- *da uspostavi potpune evidencije o svojim prihodima i rashodima,*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka, i*
- *da u svrhu izborne kampanje troši sredstva u zakonom dozvoljenom iznosu.*

*Takođe se preporučuje:*

- *da uspostavi adekvatne knjigovostvene evidencije o prihodima iz budžeta,*
- *da uspostavi pomoćne knjige o osnovnim sredstvima i da evidentiranje dobitka ili gubitka po osnovu prodaje osnovnih sredstava vrši u skladu sa računovodstvenim propisima<sup>16</sup> i*
- *riješi pitanje vlasničko-pravnih odnosa nad nekretninama koje posjeduje, koristi i sa njima raspolaze.*

---

<sup>15</sup> Kantonalni odbor SDP BiH USK Bihać i OO SDP BiH Bihać u svrhu predizborne kampanje za Prijevremene izbore za Načelnika općina Bihać ukupno utrošili 18.148,65 KM.

<sup>16</sup> Pregledom je utvrđeno da SDP BiH u svojim poslovnim knjigama nema adekvatne analitičke evidencije za svako pojedinačno osnovno sredstvo, što kao rezultat ima pogrešno iskazanu imovinu, odnosno prihode po osnovu prodaje osnovnih sredstava. SDP BiH je prihode po osnovu prodaje osnovnih sredstava iskazala u iznosu fakturane vrijednosti, a ne prema Neto principu.

Dobici ili gubici koji se ostvare u vezi sa prodajom ili rashodovanjem stalne materijalne imovine, utvrđuju se prema Neto principu, u visini neotpisane vrijednosti prodane-rashodovane imovine, odnosno u visini razlike između knjigovodstvene i prodajne vrijednosti i prikazuju se u Bilansu uspjeha u periodu u kome su i nastali.

**KOMENTAR:**

U ostavljenom roku, Socijaldemokratska partija Bosne i Hercegovine je dostavila primjedbe na Preliminarni izvještaj o pregledu godišnjeg finansijskog izvještaja za 2011. godinu. Stranka je uz primjedbe dostavila i ispravljene obrasce godišnjeg finansijskog izvještaja za 2011. godinu, čime je djelimično otklonila nedostatke u popunjavanju finansijskog izvještaja.

U skladu sa odredbama člana 13. stav (3) Zakona o finansiranju i preporukama Službe za reviziju, Socijaldemokratska partija Bosne i Hercegovine je tokom 2013. godine izvršila povrat priloga pravnom licu koje je tokom 2011. godine primila suprotno odredbama člana 8. stav (1) Zakona o finansiranju, u iznosu od 250,00 KM.

Služba za reviziju je uvažila sve argumentovane primjedbe Socijaldemokratske partije Bosne i Hercegovine i u tom dijelu izmijenila nalaze.

mr. sc. Hasida Gušić, šef Službe za reviziju

Sanja Tošović, revizor